

Siunnersuut: Kulturikkut ingerlatsineq sunngiffimmilu sammisassaqartitsineq pillugit Inatsisartut inatsisaat nr. xx, xx. xx 2016-imeersoq

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Saqqummiussissut**Siullermeerneqarnera**

Naalakkersuisut sinnerlugit matumuuna kulturikkut ingerlatsineq sunngiffimmilu sammisassaqartitsineq pillugit Inatsisartut inatsisissaattut siunnersuut saqqummiutissavara.

Naalakkersuisut kulturikkut ingerlatsinerup sunngiffimmilu sammisassaqartitsinerup nukittorsarnissaannik anguniagaqarput, taakkumi innuttaasunut inuiaqatigiillu ineriartornerannut pingaaruteqartorujussuupput. Naalakkersuisut isumaqarput kulturikkut ingerlatsineq sunngiffimmilu sammisassaqartitsineq pillugit immikkut inatsisiliornissaq tapersorsorniarlugu tunngaviussasoq pingaaruteqartoq.

Inatsisinut atuuttunut tunngatillugu (Kulturikkut ingerlatsineq sunngiffimmilu sammisassaqartitsineq pillugit Inatsisartut peqqussutaat nr. 10, 21. maj 2002-meersoq) siunnersuummi kulturikkut ingerlatsineq sunngiffimmilu sammisassaqartitsineq annertunngitsumik kisimiitillugit taaneqarput, tamannalu isumaqarpoq susassaqarfiup ilaa kulturimut timersornermullu kiisalu timigissarnermut tunngasortalik nammineq inatsisitigut tunngaviliinikkut tunngaveqarmata.

Kulturikkut sunngiffimmilu ingerlataqarnek pisortat akisussaaffigilissagaat inatsisissatut siunnersuutikkut anguniarneqarpoq, matumani pisortat oqartussaasut suliassaqarfimmi akisussaaffiisa ersarissarnissaat.

Inatsisissatut siunnersuutip siullertut siunertaraa pisortat oqartussat akisussaaffiisa pisinnaatitaaffiisalu ersarissarnissaat kiisalu suliassaqarfimmi tamatumani tapiisinnaanerat ilanngullugu eqqarsaatigalugu. Taakku saniatigut sunngiffimmi ilinniartitsineq sunngiffimmilu ornittakkat pillugit malittarisassat nutarterneqarsimapput ersarissarneqarlutillu. Aamma sunngiffimmi ornittakkat pillugit malittarisassanik ilanngussisoqarpoq.

Siunnersuummi malittarisassat arlallit Kulturikkut ingerlatsinermik sunngiffimmilu sammisassaqartitsinermik peqqussummi malittarisassanik atuuttunik annermik aallaaveqarput. Taamaattoq Kulturikkut ingerlatsinermik sunngiffimmilu sammisassaqartitsinermik peqqussummi malittarisassanik annertuumik nutarterisoqarlunilu ersarissaasoqarpoq. Tassungalu atatillugu ilanngullugu taaneqarsinnaavoq Naalakkersuisut inatsit malillugu pisussaaffimminnik qanoq isillutik naammassinnissinnaanerat pillugu Naalakkersuisut pingaarnertigut akisussaaffii pillugit malittarisassanik aalajangersaasoqarsimammat. Taamatuttaaq kommunalbestyrelsip pingaarnertigut akisussaaffii pillugit aalajangersakkanik aalajangersaasoqarpoq, kommunalbestyrelsilu qanoq isilluni inatsit malillugu pisussaaffimminik naammassinnissinnaanersoq pillugu aalajangersagaqarluni.

Ilanngullugulu erseqqissarneqassaaq Naalakkersuisut kommunalbestyrelsillu tapiissuteqarnerminni ajornanngippat sammisassat meeqqanut inuusuttunullu sammititat, inunnut avatimikkut sapigalinnut inuuniarnikkullu ajorsartunut tunngassutillit nutaatut aalajangersaaffigineqarsimmata.

Taamatut oqaaseqarlunga siunnersuut Inatsisartunut akuersaartumik oqaluuserisassanngortippara.